

Mendig Zischtig essi nor no Servelat Mettwoch Dornschtig essi d`Hüt
am Fritig es Stock trochnigs Brot am Samschtig gets meischtens nüt
ond am Sonntig velecht wennis no längt e halb verfuleti Banana
deför han ich kei Scholde me be der Artisana

Zo mer do seit en Chauffeur wo e de Schwyz duet Lastwagefahre
es esch de scho cheibe praktisch wend es Natel hesch em Chaare
nor chönn er jetz halt wäg de PTT nor no d`helfti lade wo früecher
well de räscht vom Platz de brucher jetz för Telefonbüecher

Cheres amies de Francaise de notre Nachbarlande
das Stop it Chirac Transparänt händ er total falsch verstande
eusi Fuessballer wänd doch nor de Stop vo Atomversüech zwäcks Waffe
aber er alli er alli andere er hätet rohig dörfe wyterschaffe

Also du be eusere Schwyzer Chele do chom ich au nömm drus
seit en Pfarrer öffentlech ich ben schwul mache die e Southeater drus
goht hengäge ein metere Frau es Näscht du das esch ned gloge
den esches au weder ned rächt chasch de Bischof Vogel froge

S`Militär seit de Oberst Nyffenegger das well`er onderstrieche
das chönn`mer guet met de Riniker Wasserleitige verglieche
er heig zwar gmeint mer verwötsch en ned duet er mer verzelle
doch schiembar gäbs bem Militär au e paar ondechti Stelle

De Ehrler längt eus als Nationalrot ned mer Riniker wänd no meh
zelle dromm oswärtigi Ordsbürger au e voila scho hämmer zwee
d`Frau Egerszegi eschs ehms Obrist mer wohlets noch ond nocher
well ich ha doch schoweder Angst gha es sig de Bodemaa oder de Blocher

Goht de Hersche weder einisch uf wes e de Zietig schriebe
mi Stammbeiz werd de glaub trotzdem noh s`Resterant Tannegg bliebe
do send d`Ambiance guet d`Wertschlüt au ond was`me am meischte schetzt
es send ned alli Parkplätz vo Abbrochauto bsetzt

Näbem Lüthi du do chömmmer gli no en 2. Dokter verbueche
nor esch das den en Veterinär wo Tier duet ondersueche
doch zo wellem Dokter gang ich den s`duet mi fasch ächli irritiere
wenn ich nach der Fasnacht of em Hond be ond de Kater muess uskuriere

Am 11. 11. do duet eus de Gmeindamme emformiere
das jetz bes zor Fasnacht Rinike s`Fasnachtskomitee düegi regiere
zom Glöck Ueli schafftsch du no näbebie das freut`mi om so schwerer
well sosch hättisch du jo gottfredstotz no meh Ferie als eusi Lehrer

Wo d`Puure go demonstriere send met erne Traktore
do heige d`Migro ond au de Coop en huffe Umsatz verlore
ond wosi zuefällig of em Heiwäg den dors Riniker Neuquartier crosse
rüeft de Strosser er send d`spot euse Lade esch scho 3 Woche gschlosse

10 Jahr scho han ich z`Rinike Schnetzelbänk dörfe senge
10 Jahr han ich dromm probiert euch zom Lache z`brenge
10 Jahr chom mer stossed a ich säg eifach proscht
för d`Spänder das esch Wy denn nähmi Bier Grappa ond es Moscht

Der Komedi⁹⁶

Wänd er me bsueche? Ich be dehei onder „www.komedi.ch“